
CYD-BWYLLGOR CORFFOREDIG RHANBARTH Y GOGLEDD
21/02/25

Yn bresennol: Cadeirydd: Y Cynghorydd Mark Pritchard (Cyngor Bwrdeistref Sirol Wrecsam).

Y Cynghorwyr:

Dave Hughes (Cyngor Sir y Fflint), Charlie McCoubrey (Cyngor Bwrdeistref Sirol Conwy), Gary Pritchard (Cyngor Sir Ynys Môn), Jason McLellan (Cyngor Sir Ddinbych), Menna Trenholme (Cyngor Gwynedd) ac Edgar Owen (Awdurdod Parc Cenedlaethol Eryri).

Prif Swyddogion: Dylan Williams (Cyngor Sir Ynys Môn), Dafydd Gibbard (Cyngor Gwynedd), Rhun ap Iarll (Cyngor Bwrdeistref Sirol Conwy), Neal Cockerton (Cyngor Sir y Fflint), Alwyn Jones (Cyngor Bwrdeistref Sirol Wrecsam), Graham Boase (Cyngor Sir Ddinbych) a Jonathan Cawley (Awdurdod Parc Cenedlaethol Eryri).

Swyddogion Statudol

Dewi Morgan (Prif Swyddog Cyllid) ac Iwan Evans (Swyddog Monitro).

Swyddogion eraill yn bresennol

Alwen Williams (Prif Weithredwr Dros Dro y CBC), Sian Pugh (Pennaeth Cyllid Cynorthwyol), Claire Incledon (Dirprwy Swyddog Monitro), Dave Hole (Rheolwr Rhaglen Gweithredu'r Cydbwyllgor Corfforedig), Jack Latkovic (Swyddog Democratiaeth Cydbwyllgor Corfforedig), Iain Taylor (AMION Consulting) a Sioned Mai Jones (Arweinydd Tîm Democratiaeth).

1. YMDDIHEURIADAU

Derbyniwyd ymddiheuriadau gan y Cynghorydd Nia Jeffreys gyda'r Cynghorydd Menna Trenholme yn dirprwy.

2. DATGAN BUDDIANT PERSONOL

Dim i'w nodi.

3. MATERION BRYD

Dim i'w nodi.

4. COFNODION Y CYFARFOD BLAENOROL

Llofnododd y Cadeirydd gofnodion y cyfarfod blaenorol a gynhaliwyd ar 17 Ionawr, 2025 fel rhai cywir.

5. BUDDSODDI SIR Y FFLINT A WRECSAM – DIWEDDARIAD AR GYNNYDD A CHYMERADWYAETH PORTH

Cyflwynwyd yr adroddiad gan Alwen Williams, Prif Weithredwr Dros Dro'r CBC ac Iain Taylor (Ymgynghorydd Arweiniol – Parth Buddsoddi Sir y Fflint a Wrecsam).

PENDERFYNWYD:

Cymeradwyo'r dyraniadau ariannol a gynigir yn Atodiad 1.

Dirprwyo Prif Weithredwr Dros Dro y CBC a'r Swyddog S151, mewn ymgynghoriad â Chadeirydd ac Is-gadeirydd y CBC, gyda Chynghorau Wrecsam a Sir y Fflint i gytuno ar unrhyw fan addasiadau i'r dyraniadau sy'n codi o baratoi cyflwyniad Porth 4. Er mwyn osgoi amheuaeth, "man addasiadau" yw'r rheini lle nad oes newid o fwy na 10% i gyllid unrhyw bennawd a gytunwyd arno, ac nid ydynt yn cynnwys symudiad rhwng cyllid cyfalaf a refeniw.

Nodi'r cynnydd a wnaed hyd yn hyn a gofyn bod y Pyrth sy'n weddill (4 a 5) yn cael eu cyflwyno am gymeradwyaeth, ynghyd â phenderfyniad terfynol ar gynnig y Parth Buddsoddi mewn cyfarfod yn y dyfodol, unwaith mae'r Memorandwm Cydddealltwriaeth (MoU) a'r Pyrth wedi'u cytuno gyda Llywodraeth Cymru a Llywodraeth y DU.

TRAFODAETH

Cyflwynwyd yr adroddiad oedd yn rhoi diweddariad ar y cynnydd i sicrhau Parth Buddsoddi Sir y Fflint a Wrecsam. Esboniwyd bod yr adroddiad yn dangos dyraniadau arfaethedig y cyllid hyblyg o £160m i themâu ac ymyraethau'r Parth Buddsoddi.

Cyfeiriwyd at borth 3 sy'n ymdrin â'r trefniadau llywodraethu arfaethedig ar gyfer y parth buddsoddi. Esboniwyd bod y cynigion ar gyfer llywodraethu y cytunwyd arnynt yn ystod y cyfarfod diwethaf wedi eu pasio i'r Llywodraeth ar gyfer eu hystyriaeth a disgwylir adborth dros yr wythnosau nesaf ar statws porth 3.

Manylwyd ar borth 4 sef y porth ymyraethau sydd hefyd yn cael ei weld fel gwerthusiad y trysorlys o effaith y parth buddsoddi. Gofynnwyd am ystyriaeth y Cyd-bwyllgor o ddyraniadau cychwynnol yr ymyraethau hynny a chaniatáu i'r Cyd-bwyllgor barhau i weithio efo'r Llywodraeth i fireinio a sefydlu porth 4. Nodwyd y bydd yn hyn galluogi'r Cyd-bwyllgor i symud at borth 5 sef y Cynllun Cyflawni.

Cadarnhau bod cynnydd da yn cael ei wneud ar y themâu allweddol a diolchwyd i bawb sydd ynghlwm a'r gwaith ac sydd wedi cefnogi'r broses.

Diolchwyd am yr adroddiad a diolchwyd i Brif Weithredwr dros dro'r CBC a'r tîm ac i'r Ymgynghorydd Arweiniol am eu gwaith. Credwyd bod y gwaith yn symud yn ei flaen ar gyflymder a bod hynny'n braf i'w weld. Cydnabuwyd bod cynnydd sylweddol wedi ei wneud a bod llawer o waith ar y gweill ond bod lefelau hyder yn uchel iawn a bod y Llywodraeth hefyd yn gefnogol o'r gwaith.

Ategwyd y sylwadau uchod gan fynegi balchder o'r cynnydd a wnaed a nodwyd fod y prosiect yn un cyffrous iawn ac efo'r potensial i gyfoethogi ardaloedd Gogledd Cymru gan annog diwydiannau i leoli yma.

Awgrymwyd ychwanegu'r geiriad "mewn ymgynghoriad â Chadeirydd ac Is-gadeirydd y CBC" i gymal 2.2 o'r penderfyniad a geisir. Mynegwyd cefnogaeth i'r addasiad hwn a chytunwyd a'r ychwanegiad.

6. TROSGLWYDDO'R CYNLLUN TWF I'R CYD-BWYLLGOR CORFFOREDIG

Cyflwynwyd yr adroddiad gan Alwen Williams, Prif Weithredwr Dros Dro'r CBC ac Iwan Evans, Swyddog Monitro.

PENDERFYNWYD

Derbyn y diweddariad ar y cynnydd sydd wedi'i wneud i baratoi ar gyfer trosglwyddiad arfaethedig y Cynllun Twf, ei gyllid a'r PMO i'r CBC ar 1 Ebrill, 2025.

Cyflwyno adroddiad penderfynu pellach i gyfarfod nesaf y CBC ar 21 Mawrth, 2025 i ddarparu ei benderfyniad ffurfiol i dderbyn y trosglwyddiad ac ymrwmo i'r cytundeb Cyflawni ac Ariannu ar gyfer trosglwyddo'r Cynllun Twf i'r CBC.

TRAFODAETH

Cyflwynwyd yr adroddiad oedd yn rhoi diweddariad ar y cynnydd sydd wedi ei wneud i drosglwyddo'r Cynllun Twf i'r Cyd-bwyllgor Corfforedig. Cyfeiriwyd at y penderfyniadau a geisir fel sydd wedi eu rhestru yn rhan 2 o'r adroddiad.

Ymhelaethwyd ar y camau allweddol sy'n weddill i weithredu'r trosglwyddiad fel sydd wedi eu rhestru yn rhan 5.1 o'r adroddiad gan nodi bod hyn yn crynhoi'r sefyllfa gyfredol. Esboniwyd bod y papurau trosglwyddo a'r cytundebau drafft bellach gyda'r Awdurdodau a nodwyd bod sgwrs bellach angen ei chynnal efo Llywodraeth Cymru i gadarnhau union lwybr y cytundeb amnewid.

Cadarnhawyd fel mae pethau'n sefyll ar hyn o bryd, disgwylir penderfyniad olaf yr Awdurdodau Lleol ar 25 Mawrth 2025, yn ôl rhaglenni Cabinet y Cynghorau. Hyderir y bydd y penderfyniadau yn cael eu cadarnhau a bwriedir arwyddo'r cytundeb law yn llaw efo'r penderfyniad er mwyn osgoi gorfod aros tan 25 Mawrth i orffen pob rhan o'r broses hon. Mynegwyd hyder bod yr amserlen yma'n gyflawnadwy.

Nodwyd bod gweddill y prosiect yn barod i symud ymlaen. Nodwyd bod y broses yn un eithaf deinamig ar hyn o bryd a bod rhai materion yn parhau i fod angen eu cadarnhau efo partneriaid ond parheir i weithio tuag at y dyddiad gan nodi bod y rhaglen yn disgyn i'w lle.

Diolchwyd i'r Swyddog Monitro ac i Brif weithredwr dros dro'r CBC am y diweddariad. Mynegwyd balchder o weld y cynnydd hwn gan gydnabod ei fod yn ddarn o waith cymhleth iawn gyda llawer o bartneriaid gwahanol i ymgysylltu a hwy.

Diolchwyd i bawb am y gwaith sydd wedi ei wneud i gyrraedd y pwynt yma. Gofynnwyd i unrhyw oedi posibl i gael ei drafod yn syth efo Cadeirydd ac Is-gadeirydd y CBC, gan obeithio na fydd oedi. Cadarnhawyd y bydd diweddariad prydlon yn cael ei ddarparu pe bai unrhyw newid i'r amserlen arfaethedig.

Dechreuodd y cyfarfod am 13:30 a daeth i ben am 13:50.

(Cadeirydd)